

香港商業廣播有限公司董事兼總裁演詞：

主席，各位廣管局成員，各位蒞臨的朋友你好。
多謝大家今晚出席。
若要我形容商業電台，我會說：商業電台是一把聲音。

一把聲音可以微不足道，
但是當這一把聲音跟全香港七百萬人同聲同氣，
它就不只是一把聲音，
它希望做到係全香港人的心聲。

最近搞到香港滿城風雨嘅東周刊事件，令大家警覺到傳媒專業操守對我哋生活環境嘅重要性，而身為一個以社會責任為優先考慮嘅傳媒，商業電台面對呢個傳統價值不斷受到考驗，衝激嘅大時代，承諾貫徹始終，處變不驚，繼續揚聲。

要我哋公正持平，隱惡揚善嘅聲音更響亮更有效咁為香港人講說話，聽香港人講說話，實際行動包括：我哋會研究投放資源發展一套全數碼化嘅互動語音系統，俾每一位打嚟電台嘅市民，都有機會錄低佢哋嘅意見。我哋會嘗試邀請每一位問責局長、政府官員、議員開一個私人留言信箱，等任何市民都可以因應每日香港發生嘅事打電話入嚟呢個民意收集平台，留言俾指定嘅官員同議員。商業電台會作為一個轉介人，代你哋向有關人士要求回應，佢哋可以選擇私底下回應質詢嘅市民，亦可以選擇嚟商業電台嘅大氣波段公開回應。

雷霆 881 嘅使命係一發放時代的聲音，收集社會的迴響。

香港回歸之後，香港人都好關心同想多啲了解國情，商業電台新聞部將會嚟北京成立辦事處，新聞部嘅同事會長駐北京，將國家最新消息，第一時間帶俾香港市民。

政經不分家，我哋財經節目—人生交叉盤，會繼續緊貼香港經濟脈搏，而成立咗兩年嘅財晉會，同我哋創辦嘅另外兩個聽眾會—903 idclub、雷霆 881 馬路之友一樣，希望透過電台廣播以外嘅形式，發揮社會功能。財晉會成員當中不少係來自全港各大專院校修讀財經事務嘅同學，呢個會嘅目的係為咗令新生代嘅年青人對財經有一個正確嘅認識同態度，嚟未來，節目主持人會繼續巡迴各大專院校，同同學互相切磋。

叱咤 903 是年青人夢想的聲音，我哋敢想敢做，跨媒越界，變出無限創意。
叱咤 903 歷年努力做好大氣節目之餘，亦都配合年青人生活環境同潮流口味嘅變化，不停革新，環媒擴張，涉獵出版寫作音樂演出舞台劇作...等跨媒創作。

為咗令更多敢想敢作嘅年青人求知有渠道、創作有門路。

明年，叱咤 903 將結合互聯網—地上活動上天落地，開設一個流行文化公開學院，繼續鼓吹叱咤創意豁達精神，有系統地培育創意新生代，令香港本土潮流文化更健康發展，世代相傳結果開花。

商業電台最常用的是一個「不」字，

我們不自滿、不妥協、不跟風、不安於現狀、不相信極限，

面對任何環境，我們異口同聲，永不放棄。

這種精神跟香港人一直引以為榮、永不言倦的奮鬥心不謀而合。

商業電台 43 年來亦一直本著這種精神跟香港市民共存共榮。